

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA AOKUSO 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

FALETUSI FOU O MALUA



FAAU'U FAIFEAU EKALESIA POROTESANO APIA



Susuga Joshua FS & Ataata Leatigaga (Apia Protestant Church) ma Dr. Taipisia FS & Vaisola Leilua

O LE FAASINO UPU

1. O LE LAUGA	2
2. AOKUSO LE MASINA LONA 8	3
3. FAAPA'IA LE FALETUSI FOU	4
4. FAIFEAU POROTESANO APIA	7
5. FOA'IA LE FAFINE MATIVA	7
6. EFKS SULU O LE OLA	8
7. O LE PEROFETA MULIMULI	8
8. FEAU O LE ASO	12
9. O E UA MALILIU	15
10. TAAVALE FOU A LE EKALESIA	16

O LE LAUGA

Tusi Faitau – 2 Korinito 9:6-8

Manatu Autu – “Foi ma le loto Fiafia.” (Au Leoleo)
Matua: 2 Korinito 9: 7, “*Ia taitoatasi ma filifili i lona loto, ‘aia ma le tigā, ‘aia foi ma le faatauanaui; auā e alofa le Atua i lē foi ma le loto malie.*”

(Each of you should give what you decided in your heart to give...God loves a cheerful giver.)

O le tagata kerisiano lava ia, o le tagata e tausinio mo le ola manuia, ma le ola faavavau. O lona olaga ma ana mea e fai, o lana tapuaiga ma lana taulaga, e faapolopolo uma mo le Atua, e fia fai mea sili, e fia fai mea lelei, ma le talitonuga, o mea uma lava ua faia mo le Atua, ua mautinoa ma le faatuatua, ia avea ma taulaga e manogi ma mālie i luma o le Atua.

O le afuaga lea e maua ai lona loto, ma tumau pea lona loto, tusa lava pe fesouaiina i le tele o matagi vale o le soifuaga, e tumau lava ma pipii pea lona loto i le Atua. Ao le fesili e tulai mai, e mafua i se ā ona tupu ia lagona? E afua mai le LOTO, o le loto ua faamalieina i le tumu atoatoa o le Atua. Peitai, o le upu loto, ua tele i ai tala, ma tele i ai faamatalaga, poo fea tonu e tu ai le loto, ae pe faapei foi ona foliga; e eseese talitonuga, e tofu foi le tagata ma lona silafia, e faamatala ai le loto. E lē afaina la, po o fea e te finagalo e tu ai le loto, a o le ā foi sau faamatalaga i foliga o le loto.

A e fai mai nisi, o le loto, o le fatu lava lea, a o nisi fai mai o lalo atu o le pute sei tulou, o loo taoto ai le loto. A o le talitonuga a le failauga, o le loto, o le

mafaufau lea o le tagata. O le loto, o i o loo ogatotonu i ai lagona, ma mafaufauga o le tagata soifua. Fai mai Paulo i le Ekalesia i Filipi, “*Ia ia te outou foi lenei manatu sa ia Keriso Iesu*”. O le upu lena e fa’aogaina mai le Tusi Paia papalagi, o le **MIND:** *Let this mind be with you*, ia ia te outou foi lenei manatu, ia ia te outou lenei mafaufau. E leai se isi ua vaai i se loto, pe faapei, a e mafai ona tatou iloa, i uiga, ma aga, e fa’aali mai. O le amio ma galuega faatino. E iloa foi mea uma o i le loto ina ua saunoa mai.

O le upu masani mai le afioga paia a le Atua, “*e sili foi lē ua pule i lona loto, i le na te a’ea le aai/ ‘olo*” *Faataoto 16:32*. Lea e afua ai ona maua le loto maualalo, loto fesoasoani, loto faamagalo, loto faaosi taulaga. Loto-fa’aauauna, loto mamā, o le loto faafetai. Ma le loto foai. O le loto foai la, o le feau ogatotonu foi lea o loo talanoa i ai le Aposetolo o Paulo i le Ekalesia i Korinito. O le foai ma le loto fiafia. O le mea sa tupu i le taimi o Paulo

O tagata Kerisiano i Ierusalema sa mafatia i sauaga ma le mativa (ona o lo latou talitonu ia Keriso). Na tusi ai Paulo i ekalesia eseese (e aofia ai ma Korinito) e fai se saoga o mea latou te maua, e ave sei fesoasoani ai i uso ma tuafafine matitiva. Ona o le Suafa o Iesu. O le galuega o le foa’i, na avea ma auala e faailoa atu ai le tasi o le tino o Keriso, ma le alofa faamaoni i le agaga faaKerisiano.

O le faamalosiā a Paulo, e pei o le fuaiupu ua fai ma matua “*Ia taitoatasi ma filifili i lona loto, ‘aia ma le tigā, aia foi ma le faatauanaui; auā e alofa le Atua i lē foi ma le loto malie.*” O le finagalo o Paulo i lenei mataupu, o le a’oa’oina o tagata o le ekalesia i Korinito i le loloto o le agaga o le foa’i — e lē na o le foa’i faaletino, a e o le loto o loo i tua atu o le foa’i. Na toe faamanatu i ai e Paulo, Ia outou manatua lenei mea, o le tagata e lē tele sana lūlū, e lē tele fo’i sana seleselega.

Faauigaina o le finagalo o le Aposetolo, o le olaga faaleagaga ma faaletino e pei o le galueaina o se fanua. Afai e itiiti mea sa e totō i le fanua, e itiiti foi le fua e selesele. A e afai sa e agalelei ma tele lau foa’i atu, e tele foi le faamanuiaga e toe tafe mai. E faatatau le finagalo o le aposetolo i le faamaoni i le foa’i; e lē o le aofa’iga e tāua, a e o le loto naunau ma le faamaoni e faatino ai, ma le mautinoa, e toe foi mai

faamanuiaga i lē na faatinoina le foai. Fai mai Paulo, Auā o le ā le aogā e foai ai a o tīgā le loto? E sili ai le tuu, leaga e lē mū, ma lē manogi lelei i luma o le Atua. Manaia foi sia faamanatu mo i tatou uma le au faatuatua kerisiano, lea ua tatou sauni mo le tatou faiga taulaga o le Talalelei, e lē gata o le tatou taulaga tupe, a o le tatou taulaga pese foi. Ua faamalo le faitaulaga, faamalo le faasilisili i le Atua ma lona finagalo. E talitonu, ailoga lava sa tatou faia ma se loto tiga, ma se faatauana, lau foai, auā o lea ua tatou malamalama, o tatou o tagata kerisiano faatuatua, o mea uma tatou te faia, tatou te faitaulaga ai i le Atua.

Auā fai mai Paulo, E mafai foi e le Atua ona faaopoopoina mai ia te outou mea uma e tata ai, ina ia faatumuina outou i mea uma i taimi uma, ma ia lava mea uma, ia te outou mo galuega lelei uma lava. O lona uiga e silafia uma e le Atua mea uma tatou te faia, e oo lava i o tatou loto, o le Atua foi na te faamanuia mai i mea uma ua tatou faia ma le loto malie. Tatou fai mea fiafia pea, ma loto tetele, auā fai mai le aposetolo o Paulo, *Auā e alofa mai le Atua i le tagata e foai ma le loto fiafia ma le loto malie*. Ia avea pea a tatou taulaga o se taulaga e manogi ma mālīe i luma o le Atua. Auā ua tatou faia ma le loto malie, ma le talitonu i le Atua. O le Atua foi na fetalai, *Amuia e loto mamā, auā latou te iloa atu le Atua*. O lou iloa o le Atua, o lou fai mea sili foi lena mo le Atua, e pei foi ona faia e le Atua mo i tatou.

O Iesu Keriso, o le faataitaiga sili mo tagata kerisiano faatuatua uma, o le taulaga na foai mai, ma le lē masalosalo, o lona soifua atoa, na ofo fua mai mo le faamagaloina o a tatou agasala. O lona maliu, ma lona toe soifua manumalo mai le oti ma le tuugamau, o le Taulaga ua tatou maua ai le ola, ma tatou maua atili ai lava.

NA IA FOAI MAI MA LE LOTO FIAFIA.
Amene.

Saunia susuga Ulatifa Leulua'ialii FS,

EFKS Letogo,

Pulega Vaimauga Sasa'e,

Matagaluega VAIMAUGA

AOKUSO, le MASINA lona 8

"Faauta, ou te faia ia fou mea uma lava."

Ua faamauiina i tala faasolopito o le Ekalesia, o le Aso Lua, 24 Aokuso 1830 na taunuu ai Ioane Viliamu ma le au malaga LMS i Mataniu Feagai ma le Ata. O se amataga fou lea mo Samoa - i le masina lona valu - le fuainumera ua faatusa, faauiga ma faagagana faaTusi Paia, i suiga fou po o amataga fou. O nisi o tala, tu ma aga e lagolago ai lea mau, e aofia ai le to'a valu o le aiga o Noa na faasaoina mai le Lolo, mo se isi amataga fou; o le peritomeina o tama tane Iutaia uma i le aso valu; o le filifilia o Tavita le atalii lona valu a lese, mo se isi amataga fou e sui ia Saulo, aemaise le Sapati fou i le aso lona valu na toe tu ai le Alii, ua suia ai le Sapati tuai faa Iutaia. Atoa ai ma nisi mau mai le Tusi Paia.

Pe mata o le uiga foi lea ua faia ai le Mafutaga Faafouina a le aufaigaluega i lenei masina? O le faamoemoe ia toe faafou auupega - faaletino, faalemafaufau ma faaleagaga, a o feagai ai ma le taua faaleTala Lelei. Ma ua fetai foi ma le faapaiaina ai o le Faletusi fou o Malua i lenei tausaga? A o le su'ega ulufale mo Malua, ua faatulagaina i lenei masina i tausaga uma, mo i latou ua faafouina le olaga ma ua ofo atu e a'otau mo le Tala Lelei faasalalau? Ua faailogaina foi i lenei masina, le Aso Sa o Tama - o loo i ai foi le uiga loloto o le faafouina mo faauluuluga ma ta'ita'i o aiga taitasi. O le masina foi lenei, e tauaofia ai fonotaga faafaavae a le Komiti Au Toeaina - Komiti A'oga Kerisiano, Komiti o Malua & Komiti Faatonu.

Pe a tuu mai foi i taualumaga o faiga malo a lo tatou atunuu i nei auga tupulaga, o lea foi ua i'u ina faia i lenei masina le faiga filifiliga a le atunuu, ma ua tofia ai se faiga malo fou; ua filifilia ai foi ma le Palemia lona valu na te ta'ita'i le sa o le atunuu. Aua talu mai le Tuto'atasi o lo tatou malo i le 1962, o i latou nei sa tutula'i mai e avea mo tatou ta'ita'i e ala i le tofi Palemia: (1) Fiamē Mataafa Faumuina Mulinuu II, (2) Tupua Tamasese Lealofi IV (3) Tuiatua Tupua Tamasese Efi (4) Vaai Kolone (5) Tofilau Eti Alesana (6) Tuilaepa Sailele Malielegaoi (7) Fiamē Naomi Mataafa, ma le lona (8) Laaulialemalietoa Leuatea Polataivao Fosi Schmidt.

O le masina lava ia sa ta'u muamua o Seketilisī, a o le tausaga e 8 TLM, na suia ai e le Senate a Roma le igoa ia Aokuso, ua oo mai ai nei, e faamanatu ai lo latou ulua'i tupu o Kaisara Aokuso. O se taimi lelei lenei e faafou ai mea ua tuai ua lē aogā. **F. Tolua**

FAAPA'IA LE FALETUSI FOU I MALUA

SAUNOAGA FAILAUTUSI AOAO:

O le Aso Tofi 21 Aokuso 2025, se tasi o Taea taua o le Kolisi Faafaifeau Malua; o le aso na faapa'iaina ai le Faletusi tele fou o le Kolisi, ua faaigoa o le Malua Library. O lenei galuega, o se tasi o pine faamau e faailogaina ai le atoaga o le 150 tausaga o le Fono Tele, a e ona sa le'i talafeagai ma le gasologa o le galuega, na toe tuu mai ai i le masina nei. O le afioga i le Failautusi Aoao o le Ekalesia, susuga Dr. Taipisia Leilua FS, na fai ma fofoga o le aso, na saunoa faafeiloa'i le paia maualuga ma le mamalu tele o le Ekalesia ma le au valaaulia. Ona mua lea o mea i Matautu-sa, ma momoli lapalapa o malo, o le viiga ma le faamanu i le Atua, e ala i le sauniga lotu e faapa'ia ai lenei galuega tele.

O le afioga i le Taitaifono o le Komiti o Malua, susuga i le Toeaina ia Asotasi Gu Time FT, na ta'ita'i le sauniga ma fai le Lauga. O le Tusi Paia na faitauina e le susuga Fili Si'a Matalavaea FT, a o talosaga na ta'ita'iina e le susuga Amuia Seuala FT (Failautusi Komiti Au Toeaina). O le Tala o le Galuega na saunia ma tolauluina e le afioga Failautusi Aoao o le Ekalesia, susuga Dr. Taipisia Leilua FS (silasila i le Tala o le Galuega). O le sauniga na molimauina e lana afioga i le Tuiaana, le Ao mamalu o le Malo Samoa, Tuimalealiiifano Vaaletu'a Sualauvi II ma lana masiofo, faapea le paia maualuga i le Komiti Au Toeaina ma faafeagaiga sa auai i le Mafutaga Faafouina a le Aufaigaluega i lena vaiaso.

O le mae'a ai o le sauniga, na valaauina ai le afioga i le masiofo ia Faamausili Leinafo Tuimalealiiifano, na te ooti le lipine e aloaia ai le tatalaina o le Faletusi. Na sosoo ai lea ma le valaauina o le faauluuluga o le Konekarate mo le tauaaoina mai o ki o le Faletusi, na tatalaina ai faitoto'a e le Taitai o le Sauniga, ma ulufale atu ai le mamalu o le auvalaaulia, e asiasi, maimoa ma molimauina le matagofie o totonu o le galuega tele.

Na mapu ane le paia o le Ekalesia ma le au valaaulia e maimoa ma faafofoga i faafiafiaga matagofie ma pesepesega a Malua na talatala ootoo ai saafiafiga mo le Laumua. Na faai'u le aso i le taumafataga tele na saunia e le afioga i le Tama Pule, le susuga ia Porofesa Vaitusi Nofoaiga FS, le aiga faiaoga ma le mamalu o le Laumua ia Malua, ma taualuga ai i ana fa'aaloaloga faaleaganuu maualuluga e masani ai le Ekalesia, mo le Ao mamalu o le Malo ma le masiofo, faapea susuga Toeaina ma le aufaigaluega, ma taape fiafia ai le Mafutaga Faafouina. **F. T.**

UPU FAAFEILOAI:

O le aso ma le filiga o le aso ma le mata'igatila, e aso ae lē lau aso. O le taea ma le mea na tupu ai o le taea foi ma lona tala, e taea ae lē lau taea. A o le fale na i Amoa e lau i ula ae pou i toa, a o Po foi ma Ao ma lo la fale e tulutulu i tao, e maota ae lē lau maota. O lele ua palea'e le Vaa-talatala ina ua liva le foe a le tautai o le vasa, o lea ua tatou fesilafa'i i le sootuli ma le āva fatafata.

A o le tauaofiaga a le Aiga sa-Tagaloā, na faapea atu ai Tagaloa Faatupunuu ia Tagaloa Ui, sau ina alu i lugā e logo Tagaloālagi e afio mai. Fai mai Tagaloa Ui, o le a se upu ou te fai? Tali Tagaloa faatupunuu, Fai i ai e afio mai ua 'au'au tetele le aso. Ua tautupu tau tamalii. O le asō, o lea ua tautupu, o lea foi ua tautamalii, a ua sili atu ona tau-le-Atua le asō. Ona ou manatua ai lea o le fetalaiga na i le itulagi lea, a e aitia, aua e te aitia tu a ia e aitia nofo e faigata Fonoti le Tupu. Tulou, tulou, tulou lava.

O le leo o le auauna faatauvaa, ua na o se vaa ua seuvale a o ala le mafuaalii; o le manuvale foi ua sopo i tiasā o aliiseu a o loo tālia lupe o māunu. Ou tautala ai i le ava ma le faaaloalo tele, e fai ma fofoga taumomoli o le afioga i le Taitaifono o le Fono Tele, le susuga i le Toeaina ia Enefatu Lesā FT, le afioga i le Sui Taitaifono o le Fono Tele, le susuga i le Toeaina ia Palemia Reupena, le afioga i le Teutupe, le susuga ia Melepone Isara FS, ma le paia maualuga o le Komiti o Fe'au Esee, e faatalofa atu ai i le Suafa mamalu o Iesu Keriso le Ao o le Ekalesia, i lau susuga i le Ta'ita'i o le Sauniga, lau afioga i le Ta'ita'ifono o le Komiti a Toea'ina, lau susuga i le toea'ina Asotasi Gu Time FT, faapea le au mautofi o lenei Sauniga, lau susuga i le Failautusi o le Komiti a Toea'ina, lau susuga Amu'ia Seuala FT, tainane lau susuga i le Toeaina Fili Matalāvea FT.

E avea foi le leo faatauvaa e fai ma fofoga taumomoli o le Ekalesia Faapotopotoga Kerisiano Samoa e faatalofa atu ai i lau afioga i le Ao mamalu o le Malo Tuto'atasi o Samoa, lau afioga i le Tuiaana Tuimalealiiifano Vaaletu'a Sualauvi II faapea le Masiofo. E faigata le paia i le Aiga Tauaana ma la latou Tama, o le Falefitu o le Ati-tagaloa, o Tula o Salogo ma Vae o le Nofaafia, le mamalu i Galuefa ia Falelatai ma le Tagata o le vavau.

E faatalofa atu foi i le paia tele lea ua sasao nei, ua malu tau ee ai le Maluapapa, le Aai e pele i le Ekalesia Aoao. Le paia tele i le Komiti a Toea'ina, o Tamā o le Ekalesia, tainane le nofo a Komiti o le Ekalesia, aemaise o le mamalu lautele o le Auaigaluega paia a le Atua i Samoa ma atunuu e mamao, o ē ua mafai ona auai mai i le Mafutaga Faafouina o lenei tausaga 2025. E faatalofa atu foi i susuga i Faletua o Toea'ina ma Faafeagaiga ua auai e molimauina lenei faamoemoe.

A o lea foi o loo mamalu pea le aitu o le aoa tulou, i lau afioga i le Pule o le Kolisi o Malua, lau susuga Professor Vaitusi Nofoa'iga ma le Faletua, lau susuga i le Sui Pule, faapea le paia o le Aiga-Faia'oga, o Faife'au Fomai Faia'oga ma Faletua, ma le Matua ia Malua i le nofo-a-suega i susuga i A'oa'o ma Faletua. E faatalofa atu foi i le susuga ia Lee ma le New Era Construction faapea le afioga ia Luamanuvae Audrey Setu, le Project Manager o lenei galuega.

TALOFA TALOFA TALOFA LAVA.

I le ava ma le migao e tataui ai, e valaau fa'aaloalo atu ai i lau afioga i le Ta'ita'i o le Sauniga, lau susuga i le Toea'ina Asotasi Gu Time mo le amataina o lenei Sauniga tāua mo le faapaiaina o lenei Faletusi ua faaigaina o le MALUALIBRARY.

TALAOLE GALUEGA

Lau susuga i le ta'ita'i o le Sauniga, le paia maua luga o lenei sauniga mamalu, o sina Tala otooto o le nei galuega na finagalo ai le Ekalesia Aoao e ala i lana Fono Tele i le tausaga e 2024 ina ia tuuina mai i le Komiti o Feau Eeseese ina ia faatinoina loa ma le faaunautaga ina ia fai ma faamanatu tāua o le faailogaina o le 150 Tausaga o le Fono Tele e pei ona faailogaina i le masina o Me i le Fono Tele o le tausaga nei, 2025.

Na lē talafeagai le taimi mo le faamoemoe o le 150 Tausaga o le Fono Tele, na finagalo ai le afioga i le Ta'ita'ifono, susuga i le Toea'ina ia Tunumoso S. Iosia ina ia 'aua le faanatinatia le galuega ne'i ma'umau le leaga, ma ua mafua ai ona finagalo le Komiti e faamae'a lelei le fale ma ia faatulagaina ia talafeagai ma le Mafutaga Faafouina e pei ona tatou molimauina nei.

TALAOOTO O LE TUPE

KONEKARATE AUTU: NEW ERA

CONSTRUCTION: \$6,188,976.11

ISIKONEKARATE:

Air Mālūlū -

Eletise -

Fire Alarm -

Si'o Faataamilo -

Carpark & Auala Faataamilo -

\$1,195,639.78

PROJECT MANAGER:

Luamanuvae Audrey Setu: \$146,649.50

PEMITA:

EPC -

SFESA -

PUMA -

MWTI -

\$162,439.57

TUUAOFA'IGA: TINO ATOA

OLE FALE: **\$7,693,704.96**

Tupe Fa'aagaga mo le Galuega:

(I'uga a le Fono Tele) \$8,000,000.00

Fuafua se talosaga mo le Fono Tele 2026 mo se faaopoopoga e faamae'a lelei ai isi mea, (se 10%)
\$800,000.00

TAU ATOA FUAFUAMO LE GALUEGA:

\$8,800,000.00

Tupe Toetoe mai le galuega (Tino o le Fale):

\$1,106,295.00

Faatotogaina (Meafale)

\$700,000.00

TUPE TOTOE O LE GALUEGA:

\$406,295.00

O upu faamafanafana a le Aposetolo o Paulo i le Ekalesia i Kolose: *"Ia outou savavali e tusa ma le Alii, ina ia fiafia mai o ia ia te outou i mea uma, ma ia outou fua mai i galuega lelei uma lava, ma ia tupu pea lo outou iloa lelei o le Atua."*
E tupu lo tatou iloa lelei o le Atua, ina ua tatou fua mai i galuega lelei uma lava. Ia viia le Atua i lona matagofie ua molimauina i lenei faamoemoe tāua.

OLE FAAFETAI

E leai se tasi upu o le gagana e faaleoina ai le faagaetia loloto o finagalo o le afioga i le Ta'ita'ifono ma le Laulau a le Fono Tele 2025 – 2026, faapea le Komiti o Fe'au Eeseese ona o lenei taunuuga

matagofie ua molimauina ai vavega tetele ua na o le Atua ua mafua ai. E muamua lava ona faaleo le agaga o le faafetai tele i lau afioga i le Ao mamalu o le Malo o Samoa, lau afioga Tuimalealiifano Vaaletō'a Sualauvī II ma le Masiofo, ua mamalu ma matagofie le nei aso ina ua afifio mai e tali le faatauula atu a le afioga i le Ta'ita'ifono ma le Komiti o Fe'au Eseese, tainane le Ekalesia Aoao.

E i ai le talitonuga, e leai se mafai o le afioga i le Ta'ita'ifono, le Sui Ta'ita'ifono ma le Komiti o Feau Eseese e faafoeina ai le gasologa o lenei galuega, pe ana aunoa ma le tatalo faapea le tapuaiga mau a lau afioga i le Taitaifono, le susuga i le Failautusi tainane le paia o le Komiti a Tamā o le Ekalesia, faapea le Nofo-a-Komiti ma le Ekalesia Aoao. Faafetai tele mo la outou tatalo ma le faanounoumanū i le alofa ma le agalelei tele o le Atua ina ia manuia ai lenei galuega.

E le faagaloina le galuega tele na feagai ma le afioga i Ta'ita'ifono ma Sui Ta'ita'ifono o le 2024-2025, le susuga i le Toea'ina ia Tunumoso Iosia faapea le susuga i le Faife'au Peinisione ia Esera Auatama Esera, i le faatulagaina o lenei galuega ma lona gasologa mai i le amataga. E ui ina le faataunuaina le faamoemoe na fuafuaina, a ua talitonu ua tele lo lua sao i le nei galuega matagofie ua tula'i mai. Faafetai le Alofa i le Ekalesia. Viia lava le Atua.

Le afioga i le Ta'ita'ifono ma le Laulau o le Mafutaga a Malua Tuai, o lo tou paia na taulamua i le laga'iaina o lenei faamoemoe lelei mo se Faletusi mo le Kolisi Faafaife'au. O le taunuuga ua molimauina nei, o le faailoga manino lava o lo tou alolofa i le Kolisi Faafaife'au i Malua i la tou lagolago faifaipaea mo le manuia o le Kolisi. Faafetai, faafetai tele.

E momoli foi le agaga o le faafetai i le New Era mo le faatautaiga o le faatinoina o lenei galuega aemaise o lona tino mai i le taunuuga ua faamae'aina ai. E ui lava i le tele o faafitaauli na feagai ai i le faagasologa o lenei faamoemoe, a o lea lava ua tau i le i'uga ma ua matagofie i le silasila a le Komiti tainane le Ekalesia.

E faaleoina foi le agaga faafetai tele i le lagolago malosia a Kamupani uma o loo tofu sao i le faataunuaina lelei o lenei galuega ina ia tino mai, e pei o le FSEFA, EPC, PUMA, MWTI, T&F Enterprises, Toleafoa Construction, aemaise o le fesoasoani tele a le afioga ia Taito ma lana aufaigaluega. Viia le Atua.

Faafetai tele i le afioga ia Lumanuvae Audrey Setu, o le Project Manager o lenei galuega, mo le auaunaga matagofie mo le Atua e ala i lenei galuega. Faafetai

tele lava. Lau afioga i le Taitaifono o le Fono Tele, Enefatu Lesā FT, lau afioga i le Sui Taitaifono, Palemia Reupena FT, lau susuga i le Teutupe, Melepone Isara FS, le mamalu o le Komiti galue, faapea le Komiti o le Faletusi, atoa ai ma le Komiti o Feau Eseese, faafetai tele i lo tou finagalo alofa i le Ekalesia aemaise o le Kolisi e pele i le agaga. Malo le galulue, faafetai le alofa faamaoni i le Atua.

Ua maua lava le viiga o le Atua, lau susuga i le Pule o le Kolisi, Professor Vaitusi Nofo'iga ma le Faletua, le susuga i le Sui Pule ma le Aiga Faiaoga ma nai o outou Faletua, aemaise le paia i le Matua ia Malua, ua lē 'ole lea. Ua viia le Atua i lo tou soifua ofoina ma faaaogaina i le faagasologa o le nei galuega tele. Na o tou tausi fonotaga a Komiti, na o tou tausi foi le aufaigaluega a le New Era, aemaise ai foi le au-Kamuta a le Ekalesia. Aemaise foi o le tele o le fesoasoani a nai A'oa'o talenia i le faakamuta na fesoasoani i le tele o galuega na fia faatulagaina mo le faamae'aina o le Faletusi. Faafetai tele Malua mo mea uma ua e faia mo le viiga o le Atua.

E mulia'i ae lē faaitiitia lona faatāuina i finagalo ma manatu o le afioga i le Taitaifono ma le mamalu o le Komiti o Feau Eseese, le paia e o le Ekalesia Aoao, mai lava i ona tumutumuga se ia oo atu i le lautele o le fanau faatuatua a le Atua, mai lava i matua matutua e oo lava i tupulaga lalovaoa, o lau taulaga osi i le Atua i lea tausaga ma lea tausaga, ona o lou faatuatua ma le talitonu i le faaolataga a le Atua e ala ia Iesu Keriso, ua mafua ai ona gafatia e le Komiti ona faatinoina I'ugafono a le Fono Tele e pei o lenei Faletusi, auā le a'otauina o fanau a le Ekalesia, a o Faife'au o le lumanai mo le Ekalesia, le atunuu, faapea le lalolagi atoa.

Ona fa'aaogaina ai lea o lenei avanoa e faamaualalo atu ai le Ofisa Tutotonu o le Ekalesia, le afioga i le Teutupe ia Isara ma lenei auauna faatauvaa, ma le aufaigaluega uma, pe a fai ua lape se auaunaga i le faagasologa o lenei faamoemoe. O upu masani i faiva o le gataifale, "E poto lava le tautai ae le atoa I'a i le liu o lona sã." E matua atu iina lo matou faatauvaa e magalo ai so matou faaletonu. Tumau i le Atua Tolu Tasi Paia le Viiga ma le Faamanū, nei ma se ia oo i le Faavavau, faavavau lava, AMENE.

Faia ma le fa'aaloalo tele lava,



.....
Dr. Taipisia Leilua FS,
Failautusi Aoao.

FAAU'U LE FAIFEAU APC

O le Aso Lulu 27 Aokuso 2025 na faia ai le sauniga faapitoa e faau'u ai mo le tofi Faifeau Samoa (FS) le susuga Joshua Leatigaga AM ma lona faletua ia Ataata ua valaauina e le Ekalesia Porotesano (Apia Protestant Church) e fai mo latou faifeau. O le sauniga o le Faau'uga na faia i le Fogafale Ono o le Maota o le Ioane Viliamu, na ta'ita'i e le Taitaifono Komiti Au Toeaina, susuga Asotasi Gu Time FT ma fai le Lauga. O le Tusi Paia na faitauina e Misipalauni Faatau FT, o le faalauiloaina o le faifeau faau'u ma lona faletua na saunoa i ai le Failautusi Komiti Au Toeaina, susuga Amuia Seuala FT. O le Tatalo o le Faauuga na saunia e Auva'a Peseta FT, a o susuga Asotasi Time FT ma Lauie Lupematasila FT na Faa'e 'A'ao mo le Faauuga.

Sa le'i mafai ona auai le afioga Taitaifono ma le Sui Taitaifono Fono Tele, ona o tuatuagia ma faiga malaga tau le galuega a le Ekalesia. A e na molimauina e le susuga i le Failautusi Aoa, Dr. Taipisia Leilua FS ma le Teutupe susuga Melepone Isara FS ma o la'ua faletua. Na auai foi sui o le Komiti Faatonu ma latou faletua, aemaise le mamalu o aiga o le faifeau ma lona faletua, faapea nisi o le Ofisa Tutotonu. Na malaga faapitoa mai ma sa auai le susuga i le Toeaina Faatonu ia Lau'ie Lupematasila FT ma le faletua ia Autalaga, o le Faafeagaiga o le EFKS Northside, Pulega Purisipeni Matu, Matagaluega Kuiniselani, o matua faaleagaga i la'ua o le faifeau ia Joshua ma Ataata.

O Joshua na ulufale i Malua 2019 i'u mai i le 2022, ma galue ai i le Matagaluega A'oa'oga Kerisiano o le Ofisa o le Matagaluega o Kuiniselani. O se lupe faalele a aiga ma afioaga o Salelologa ma Fasitoota, a o le faletua ia Ataata o se taulaga soifua a aiga i Vaimoso, Saasaai ma Lalomanu. O le Aso Sa 31 Aokuso na osia ai le Feagaiga a le susuga Joshua FS ma Ataata, ma le Ekalesia Porotesano i Apia i lo latou malumalu. Na ta'ita'iina lea sauniga e le susuga Asotasi Gu Time FT, ma sa auai e molimauina le susuga Lauie Lupematasila FT ma le faletua, o le Failautusi Aoa EFKS ia Dr. Taipisia Leilua ma le faletua, faapea le mamalu o le Ekalesia Porotesano. O le afioga Tagaloa Tuala Sale Kerslake na saunoa fai ma sui o le APC e molimau i le latou faiga filifiliga e saili so latou tofi talu ona tuua le galuega e le susuga Nuuausala Siaosi ma le faletua ia Malu i le 2024. O le APC o se Aulotu LMS na faapitoa mo misionare ma aiga papalagi; o latou faifeau e saili ma auina atu e le LMS/EFKS. Ia manuia le galuega, ma ia i le Atua le viiga.

LE FOA'I A LE FAFINE **MATIVA UA OTI LE TANE**

O le Manatu Aoa o tagata e le o ta'ua o latou suafa, o loo aofia ai le tala i le fafine mativa ua oti lana tane, e le o ta'ua lona igoa, ma lana taulaga e lua tupe siliva. O le taulaga lea na fetalai ai Iesu, e sili atu nai lo taulaga a i latou uma sa lafo, o le toatele foi o i latou o mau'oa. E talitonu e tele se tamaoiga faaleagaga na laulauina i soo se la'o'ai, e faavae mai lenei tala; a o nisi foi nei motuga'afa:

(1) O Iesu na te silafia mea uma, e ati foi lana silafaga. Na silafia manino e Iesu tagata ta'itoatasi - o latou igoa, o lagona o latou loto ma mafaufau, o le aofai o latou taulaga na lafo, ma le aofa'i o latou faaputuga 'oa o loo totoe mai ai. O le mea lea, 'aue e te popole pe afai e le iloa e nisi lau taulaga, 'aue foi e te fia faafoliga i luma o tagata, aue o loo silafia lelei e Iesu lou suafa, o lou loto ma le agaga e fai ai lau foa'i. E te maua foi le tali ma le tau e talafeagai.

(2) E taua le aofa'i o le foa'i, le tele o le numera. Ae sili ona taua le aofa'i o le loto malie, le aofa'i o le naunau fia fai mea lelei, fia maua ni mea se tele e saga faatele ai le foa'i. E sili atu lena, nai lo le faapea ifo o le loto, ua lava lea ua i ai, tau o se mea e iloga ai, ua pau o se mea ua foai mai e le Atua.

(3) Ia 'aue le ave le itiiti o le taulaga a le fafine, e fai ma faanoi o le faaititi o lau foai. O le fafine e mativa, ua oti foi lana tane, na o le pau lena o le mea sa i ai, ae na 'ave uma, e leai se mea na faatotoe. Ne'i manatu se tasi e ave le mativa o le fafine e fai ma ufiufi o lona foi mativa, ae ona o le paie ma le faapalapala, faatuutuu i le le tagolima, ma le faavaivai e saili ona maua lea.

(4) Sa le'i manatu le fafine mo a taeao ma ona tuatuagia, sa le'i popole pe faapefea le isi aso. E sau le aso ma lona 'ai, e tusa ma le a'oa'oga a Iesu. O le isi lea vaivaiga tele o le ola fai taulaga - ua fefe ma popole mo lena tausaga e le'i taitai ona oo mai, ne'i le mafai ona toe ausia le taulaga ua fai nei ma sona faasiliga. Ua fua foi le foai nei, i le taulaga o ananafi, tainane ina o loo faula'i le oloa i lenei aso.

(5) Na si'itia i luga e Iesu le taulaga a le fafine mativa, ona o le ituaiga taulaga lea na la afio mai e fai - o le taulaga e 'ave uma, na faamativaina ai o Ia, ina ia faatamaoagaina i tatou i lona mativa. A o tatou sauni atu foi i faiga taulaga faai'u o lenei tausaga, ia amata nei ona saili lau foa'i; 'aue le faatali i le toe aso, ona faapea ane foi lea, ua na o le 2 tupe siliva. Fai atu ai foi.

F. Tolua

OSI FEAGAIGA EFKS **SULU O LE OLA**

O le aso 19 Iulai sa osia ai le feagaiga a le EFKS Sulu o le Ola, i le Pulega Manukau i Matu, o le Matagaluega Manukau, i Niu Sila ma lo latou faifeau, le susuga Semi Iosia ATN ma le faletua ia Fuapepe Sititi Iosia. O le Toeaina o le Pulega susuga Victor Pouesi FT na ta'ita'i le sauniga, o Martin Mariota FS (faafeagaiga EFKS Mangere West) na saunia tatalo, a o Ekepati Va FS (EFKS Arasi o Lapanona) na faitauina le Tusi Paia ma saunia le Lauga. O lenei sauniga mamalu na auai ai ma molimauina e le Toeaina Faatonu o le Matagaluega Manukau, susuga Anatu Reupena FT (Pulega Waikato), o toeaina ia Talia Tapaleao FT (Pulega Manukau Sasa'e), Iosefatu Patea FT (Pulega Manukau Sisifo) ma o latou faletua; o matua faaleagaga o le faifeau ma le faletua, le susuga Faisiota Autagavaia FS o le EFKS Alafua i Faleata, o le faafeagaiga a le faletua ia Fuapepe ma le aiga sa Sititi. Na faapea foi ona faatumulia i le paia o le aufaigaluega ma o latou faletua o le Pulega ma le Matagaluega, aemaise le mamalu o aiganalua, o uo ma paaga a le faifeau ma lona faletua mai Samoa ma itu e fia o le Ekalesia. Sa le'i faatinoina le sauniga o le Faamanatuga, e pei ona faia i isi sauniga o Osiga Feagaiga. O lenei vaega o le tapuaiga e le faamalositia, e le o i ai se upu a le Tusi Failotu Ia Viia lou Suafa, pe o se vaega o Iugafono Tumau, a e o loo taoto lava i le faautautaga a le susuga a le Toeaina e ta'ita'iina le Sauniga, ma le faasologa ua faataatia e le Pulega.

Na mae'a le sauniga ona afe ane lea o le mamalu o le faapotopotoga e tali le valaau fa'aaloalo a le Ekalesia i Sulu o le Ola ma aiganalua, mo le tausamaaga ma fa'aaloaloga faaleaganuu e masani ai. Sa faapea foi ona silatoga le paia o le aofia i le o le Feagaiga na saunia e le Ekalesia, e pine ai le feagaiga osia e tusa ma le aganuu mamalu. O le susuga Semi Iosia na i'u mai Malua i le tausaga 2023 ma lona fa'aaloga o le Bachelor of Theology. Ua sui tulaga nei i la'ua ma fa'aauau le galuega i Sulu o le Ola, ina ua maliu le Toeaina susuga Iakopo Isaraelu FT, a o tauaofia le Fono Tele a le Ekalesia i le tausaga talu ai 2024. Sa auai lona faletua ia Kuini Isaraelu e molimauina le aso fiafia o le Ekalesia sa galulue ai. Ia faamanuia le Atua i le galuega ua amata, ma ia i'u sauniga ma osiga taulaga ua faia, i le viiga o le suafa mamalu o Iesu Keriso le Ao o le Ekalesia.

O LE PEROFETA **MULIMULI**

(The Last Oracle, tusia e James Rollins)

O itu uma o le auala, sa paka ai loli ituaiga tuai i autu maulalo poo pi'oga. E atoa le taseni o lo latou faitau aofai. Sa nonofo ai tamaloloa tau faaofiofi i totonu. O le nofoa i luma, na faalagolago atu ai Luka ma tautala faanatinati atu ia Rosau. Na faatelegese e Rosau le taavale, a o Luka na faasasa'o atu lona lima i fafo o le faamalama o le pasese ma talotalo atu ai i tagata.

Na manino le uiga o lana faailoilo.

Ia mulimuli mai ia matou.

A o fa'aauau pea le limosini, na tau fai mulimuli mai i ai loli i ona tua. E pei o Faatonu Koloue, sa faatatagi atu foi e Luka Eni lana ia faailoilo, na fa'aaoga ai telefoni sa i tua i le fale talimalo ina ua latou le mafai ona logo le faatonuga tu totonu.

Na manatua e Karai upu a le tamaloa i le faamatalaina o le Romani: O matou o loo i soo se mea. Na faamaonia le sa'o o Luka ina ua talia mai lana valaau faailoilo. O tua atu o le limosini, na faapotopototo mai ai se itutaua o Kipisi.

11.30 taeao

Atumauga Urale i Saute

O le mamao o le alu o Monike i totonu o le maina, o le saga mautu foi lena o lona talitonuga o loo tuufua le nofoaga. Na te le'i faalogoina ni leo, po o le pa'o mai o ni masini i se mea mamao. Sa avea lea ma faafilemu i lona mafaufau, auā o lona uiga e le'i iloa pe maua i latou e nisi; peitai sa avea foi ma faamamafa i lona loto. O le sāo ma le filemu, e foliga mai o loo taofi i totonu le mānava a le nofoaga.

Na aga'i atu Monike i lalo o se ana tu faatifa, a o lagona le tiga o lona vae na lavea pei e mu i se afi. O le leai o se faafanua, na mulimuli ai Monike i asaga a se tagata na faataatitia muli sikaleti ma faguvai i le faitotoa i luma o le maina. E le o ni asaga sa faigata ona saili. O le fola oneone o le auala na manino ai tulaga o seevae. O le tagata na ia uia se auala faasasa'o i tua, a o kolosi ifo i lalo i ala sopo.

Ma e ui ina pei e tuufua ma gaogao le nofoaga, ua maua nei e Monike ni molimau e tele i ni taualumaga sa fai iinei i ni aso ua te'a: o asaga felesia na lafoa'i i oga uamea, o mea faigaluega fou ma iila sa faalagolago i puipui, o se pusa e tuu ai aisa ua tia'i, sa 'afa le tumu i vai ma atigi 'apa pia.

Na mulimuli atu Konesetatino ma lona tuafafine, a o Piota na pipii atu i le suilapalapa o Monike. O mata o le tamaitiiti sa lapopo'a i auala pogisa. Na lagona e Monike le fiva malūlū o lona fefe a o pipii mau atu Piota ia te ia. E lē o avanoa nunumi na faafefeina o ia, a o le pogisa. Sa fai lava ma tapē e Monike le mōlī e iloa ai poo i ai se isi malamalama.

O taimi na e matua'i maopo ai le fusi a Piota ia te ia. Sa faalatalata atu foi Marata i le tama, e puipui, ae oo foi i le manuki sa gatete i taimi o le pogisa uliuli pato'i, e peisea'i sa ia auai faatasi ma faasoa le mata'utia o Piota.

Na taunuu ifo Monike i le pito i lalo o le faase'ega. Na sosoo atu i se isi foi auala umi sa i ai se auala o nofoaafi ma se fusipa'u sosolo o taatia e le'i ola. A o ia saili mo ni tulaga seevae, na ia maitauina se malama itiiti mai le pogisa i le taufaasi'usi'uga o le ana. Na ia faapupu'u, toso atu Piota i lona itu ma tapē lana moli uila.

Na faapulou ifo i latou e le pogisa e pei o se ieafu. A o le faatausi'usi'uga o le ana, na manino mai ai le ataata o se taupulapula.

Na sōsō atu Konesetatino i tala ane o Monike.

"Ia le toe i ai se malamalama," na musumusu atu ai Monike i le tama ma tuu atu i ai le moli uila ua tapē. Pe afai e sesē o ia i le tuufua o le nofoaga, na te le'i mana'o e faailoa lo latou oo mai i le faasusulu atu o se malamalama.

Na sisi a'e i luga e Monike le fana na ia toese mai le fitafita Rusia fanafana mamao ua oti. "Ia ffilemu," na ia lapata'i atu ai.

Na faavāvā ifo Monike i lalo i le ana. Na ia savali i luga o sooga o le auala o le nofoaafi, e lavea'iina mai ai le pa'ō o le manutinuti o otaota o le auala. Na mulimuli atu tamaiti i ona tulagavae. Na faapaleni atu Marata i luga o ala o le nofoaafi. A o latou faasolosolo atu, na faalogologo toto'a Monike pe i ai se leo e lagona atu. Na pau le leo na ia lagona o le tulutulu va va o le pa'ū ifo o le vai. O se leo na faatuputupu tetele a o latou aga'i ifo i lalo o le ana. Na iloa lelei e Monike o loo latalata ane i le mea o loo latou i ai, le nofoaga o le Vai o Karakei.

Na ia sogitia foi le tuputupu malie mai o se manogi, o se paluga o suaau, o ga'o taavale ma kasa o le kiso. Peitai a o latou taunuu atu i le pi'oga, na taia i le isu o Monike se isi manogi ese mai le manogi o galuega ma atina'e faainisinia. O se manogi mafumafaga, o le masa o tino mamate.

E ui ina sa le'i atoatoa ona ia malamalama, ae na luelue atu pea lona ulu. "O le a le mea na iloa e Piota?" na ia tuliloa atu ai.

"O ia o se emepata malosī. Na ia lagona o oe e te fesoasoani ia i matou. Na ia iloa foi lou igoa. Fai main a musumusu atu lona tuafafine ia te ia i lana miti. O ni tagata uiga ese le toalua lena, e malosī tele."

Na lagona atu e Monike se iuleo o le fefe i le leo o le tama.

Na tepa lelavā atu foi Konesetatino i tua ia Piota, ona faasaga loa lea i le galuega. "O le ala lena o lo matou o mai ia te oe."

O lana filiki mulimuli i le ki, na ola mai ai moli i luga o le laupapa faatonutonu. Na faailoa mai ai ata e uliuli papa'e, o vaaiga mai itu eseese o se ana itiiti, na tumu i fatāmanu. O le fola sa faamau loka ai se ugamata uamea.

O le fatu lea o le Fuafuaga Satani.

O se gaioiga na minoi sa tosina atu ai le vaai a Monike i le tv ogatotonu. Na faailoa mai ai se nofoaafi o malolo i fafo o le nofoaga o maina. O taavale e la'u ai koale na tumu i tamaiti. O nisi tamaiti sa feosofi i fafo ma tutū solo i autafa ma le fememea'i. A o nisi sa foliga mai e taliē ma ta'aalo.

Na uu mau atu ma taofi e Konesetatino le lima o le ofu o Monike. "O lea... o lea ua i ai iinei i latou."

Sa nofo Savina i totonu o le fale faatonutonu o nofoaafi sa malamalama lelei, faatasi ma inisinia e toalua sa i ona autafa. Sa faamae'a lelei le tapenaga o taimi ma laasaga uma i luga o komepiuta e lua. O le fale faatonutonu sa i totonu o se nofoaga i lalo ifo o se tasi o fale sa nonofo ai tagata a ua tuufua. Sa le'i i ai ni faamalama. O latou mata e iloa ai le lalolagi na maua mai tv e fitu na uaea faapipii i le puipui. Na fa'aali mai ai ata e tapu'e mai totonu o le ana ma le nofoaga o faatino ai le fuafuaga.

Na ia faatau pupula atu i le nofoaafi o loo tum o se isi ana manava, ona ia tu lea i luga, ua le mafai ona nofo nofo lelei i lalo. Sa le'i mafai ona fai lona tui puipui, ua pisi tele i tapenaga mulimuli. Na ia liliu ese mai le iloa atu o le nofoaafi. E lē ona e tiga le vaai atu i ai – auā sa tiga – a e ona o le lagona polepole vale sa osofia ai o ia.

Na ia toe siaki le taimi i lana uati. Ua te'a mamao le 'afa o le fitu, a o lenei e le'i toe maua mai se tala mai ia Nikolasi. Na ia ulufafo ma le fale faatonutonu, ina ia 'aue ne'i iloa e se tasi le milomiloga o ona lima. O se uiga vaivai faatamaitai, ma na ia taumafai malosī e

A o latou taamilo ma le faaeteete i le pioga, na iloa e Monike ua faai'u le auala ina ua tau atu i se ana ogatotonu, na foa mai le papa. O lona itiiti pe na o se lona selau o le telē o Keliapinisiki 88, peitai o lona maua luga e tusa o se fogafale tolu ma lona lautele e tusa ma le afa o se malae lakapī.

O le tele o le fola na ufitia paepae solo ai meafaigaluega ma faaputuga o galuega sa fai: o taiga uaea ma uamea, faaputuga laupapa, o fatāmanu e le'i uma na talai, o faaputuga maa. O le isi itu na ea a'e ai se vili maa maua luga, na faatu i tua o se loli. O le nofoaga e foliga mai na tuua faanatinati e ni tagata. E leai se faavasega lelei na faatitia ai, e pei o se tagata na tapena faavave le uta a se taavale, a e tia'i faasalalau ai mea o totoe. Ae o le mea sili na tuu ai pea le moli o loo mumū.

Na i ai ma isi moli na mumū mai le isi itu o le potu. "Faaeteete," na fai atu ai Monike. Na ia geno atu i tamaiti ina ia solomuli i tua, ma ia sauni e feosofi pe lalafi i tua o faaputuga otaota pe afai e tatau ai.

Na toloto lo atu Monike i luma, faapupuu maua lalo, o lana fana ua sauni i lona tau'au. Na ia alu fepi'opi'oa'i, taofiofi lana manava, ma faautauta lana laalaa. Na ia taunuu i le isi itu, ma maua atu ai se seti o faitotoa uamea maua luga, na sului mai ai le malama o moli. Na foliga mai e fou atu nai lo le maina. O le itu taumatau na i ai se tama'i faleo'o. Na iloa atu e Monike i lona faitotoa matala, ni masini komepiuta pogisa, o ki o komepiuta, ma ni faasologa ki o moli. E leai se tagata na i ai.

Na maitau e Monike le gatete o lana fana. Na mate'ite'i ma iteite gofie. Na manava i totonu tau faato'a lona moa. Na malosai mai le manogi iinei. I le itu agavale, na iloa atu ai e Monike se faaputuga suauu i tua atu o mea faigaluega. Na ia toloto lo atu ma autilo atu i le pioga.

E le o ni suauu. O le toto.

Na ia maua ai le pogai o le manogi. O le faaputuga o tino o tagata oti na taatitia i le faitotoa i tua, na taataai i toniga o faigaluega maina po o peleue papa'e o fale su'esu'e. O le toto ma totoga na pispisia ai le puipui o le fale i tua atu.

Na fasioti tafana e vaega faaoosala.

E i ai le tagata na ia fufulu ese tagata uma sa i le fale. O ona tua atu, na toloto lo mai ai Konesetatio ma sau i luma. Na foi mai Monike, lūlū lona ulu, ma faasino atu i le fale sa i ai komepiuta. Na te le'i mana'o e vaai tamaiti i tino oti o tagata. Na ia geno atu ia Piota ma Kisika ina ia faatali i le mea o i ai.

Na faatasi ane Konesetatio ia Monike a o ia laa atu i faitotoa. "Sa ou iinei muamua," na fai atu ai le tama. "Na faataga matou e ti'eti'e i nofoaafi i nisi taimi. O ki nei e faatonutonu ai nofoaga e taunuu ai nofoaafi."

"Faasino mai ia te a'u," na fai atu ai Monike.

Ua uma ona faailoga e Konesetatio fuafuaga na fai e le Faatonu - Aoa Savina Maratova, na faaigoa o le Fuafuaga Satani. Na taatia i tua atu o faitotoa nei. Na faaofiofi atu le toa lua lea i totonu o le faleoo, na maitau iloilo e Konesetatio ki faatonutonu o fale nofoaafi, o ona mata sa pulato'a i mataitusi o gagana maotua na tusia ai. Na pei e lagona e Monike lona mafaufau ua saosaoa atu nai lo le malosai e masani ai. Ina ua mae'a sina sekone o iloilo, na felele ai loa ona tamatamailima i luga o le laupapa o ki, ma save'u solo ki ma lona to'a, e pei o se mea ua leva ona ia faia faaselau.

A o ia galue, na fesili atu Monike, "Na faapefea ona e iloa le Fuafuaga Satani?"

Na tepa atu Konesetatio ma lana vaai e pei ua ma. "O la'u taleni o le su'ega faanatinati o le tali ma le faatulagaina o suesuega ma le mautinoa. E masani ona ou faigaluega i le potu suesue faakomepiuta o le Uareni." Na faanunumi ona tau'au.

Na malamalama Monike. E mafai ona e faaliliua se tamaitiiti e ave ma savanna, a e o ia lava o se tama: masalosalo, ulavale, sogasoga ma sailiili i tua atu o tuaoi.

"Na e tagofia ma sailiili i faila a le tamaitai."

Na toe faamimigi ona tauau. "I le vaiaso talu ai, o Sasa – le tuafafine o Piota – na ia tusia mai se ata ia te au. Na aumai i le valuāpō. Ina ua matou feala uma i se moe vavale faate'ite'i a Piota."

"O le a le ata?"

"O le nofoaafi iinei, ma le toatele o tamaiti na tietie ai, na feoti uma ma mu i le afi. Na faailoa ai foi le nofoaga o maina o loo i tua atu o faitotoa nei. Ia... ona oo lea i aso e sosoo ai, na ou tago ai su'e faila o le fuafuaga. Na ou iloa ai le mea sa fuafua ma le taimi e tupu ai. Ou te le'i iloa le mea a fai. Poo ai ou te talitonu i ai. O Sasa na o ma Fomai Dr. Raeli i Amerika, ona ou talanoa lea ia Piota." Na lulu e Konesetatio lona ulu. "Ou te le iloa pe na faapefea ona iloa e Piota... atonu na te le'i iloina... e faapena lava i nisi taimi."

Na faatau pulato'a atu i luga Konesetatio ia Monike mo se malamalamaaga.

taofia. Na ia faasaga atu i le auala fasitepu ma savali aga'i i luga. Sa le'i i ai se nofoaga patino sa alu i ai, tau lava ina faagaioi ma ia faaminoi pea.

Na auala mai i ana paaga i totonu o le sosaiete o fesootaiga vaegaau, na ia iloa ai ni tala faasino i se 'faalavelave faafuase'i' na tupu i Kerenopili. O se mama o kasa oona na liki i fafo. Tino oti. O le nofoaga na tuua fa'aavanoa e tagata ma o ese. Ma afai sa manuia le taumafaiga a Nikolasi, o se tuua e tagata toatele o le nofoaga ua tuai tele. Atonu sa avea le vevesi o tagata ma ala na lavelavea ai lona atalii, ma ua tuai ai ona lipoti mai ia te ia. O le faatinoga o lana ia fuafuaga e tataua ona amata i le isi fasefulu lima minute, pe a oo mai le faamaoniga mai ia Nikolasi.

A o ia a'e atu i luga i sitepu, na ia manatunatu atu i se mitamita o Nikolasi, e oo lava i se fiafia faalilolilo faatasi ma le itiiti o Elena. E lē o se mea e le masani ai Nikolasi ona fiafia muamua ona faato'a faasaga ai lea i feau mulimuli ane. Ua faasolo ina tupu a'e lona ita faatasi ma lona popolega.

Na i'u ina taunuu o ia i luga o le fogafale i luga atu o le fale faatonutonu. Sa faaliliu e avea ma nofoaga e faamautu ai le au inisinia: o potu moe, o nofoaga mo faamalositino, ma se nofoaga tutotonu e tumu i sofa ma laulau 'ai. Na o le pau tagata sa i ai i le taimi nei o tamaiti e to'a sefulu. Na ia iloa uma o latou igoa taitoatasi.

Na latou tau fai faliu ma pulato'a ia te ia, o latou ulu na liliu faatasi, e pei o se lafu manu felelei ua liliu la latou folauga. Na lagona e Savina se aloiafi o le fiafia, se maitauga o le tulaga nuu ese o latou mafaufau.

O i latou nei o mataupu tau Omega, o savana e talenia tele, o latou agavaa ma taleni e sopoia le lautele o le faaletino, e oo atu i se tulaga maoa'e e lē mafaia e Savina ona faimalaga i ai.

O Porisa, le tamaitiiti sefulu tolu tausaga ma ona mata lanu moana, sa pei lava o loo ia su'esu'e loloto i le fafine. O lana taleni o le malosi o le manatua faatasi ma le taofiofi mamau sa fai ma mea taufaafefe. E oo lava i lona fanau mai sa ia manatua lelei.

"Aisea na lē tuua ai matou e o faatasi ma isi?" na ia fesili atu ai. Na luelue ulu o isi. Na folofolo fāua o Savina a e le'i tali atu. "E i ai le isi auala mo outou uma. Ua uma ona tapena a outou ato?"

Na o le sioa o latou mata. Sa le'i manaomia se tali. Ua uma ona teu latou ato. O le fesili a le fafine, sa na o le faailoa ai o lona fefe o loo i ai. O ona luma o loo taatia ai le paoa e feulaina le Nuumoni i le isi laasaga

fou. Ma o lalo ifo, na iloa e Savina o lena paoa sa taatia i fafo atu o lona malamalamaaga.

"Tatou te malaga ese i le isi itula." Na fai atu ai Savina. O pea mata lanu moana e sefulu sa faatau pulato'a ane ia te ia.

Na lagona atu le pa'ō mai o seevae i ona tua. Na ia faliu i tua a o faatasi ane se inisinia ia te ia.

"Lau afioga i le Faatonu," na fai atu ai, "o loo i ai ni faaletonu i faitotoa pa i le isi itu o le ana. Pe mafai ona e faatonu mai pe faapefea ona tatou agai i luma."

Na luelue le ulu o Savina, ua fiafia e taula'i lona mafaufau i se faaletonu.

Na mulimuli atu o ia i le inisinia a o la'ua toe foi atu i fasitepu. Na ia lagonaina pea le mamafa o le faatau pupula atu o pea mata e sefulu, o tau mulimuli ma tuliloatu o ia, e maalili ma inoino atu i o latou lagona. O le mana'o e alofia la latou faamasinoga, na ia faavave ese atu ai i lalo i le sitepu.

"Tatala faiototo'a!" na valaau atu ai Monike ia Konesetatino.

Mai totonu o le potu faatonutonu na lue mai ai le ulu o le tama. Na lagona le leo o afi eletise, ma amata ona sosolo ese faitotoa pa mai le auala, na nunuti atu i le ogatotonu.

Na tamo'e saosaoa atu Konesetatino agai ia te ia, ua tau lē manava. "Toe lima minute," na lapata'i atu ai le tama.

Na malamalama Monike. Ua uma ona tuu e Konesetatino le faatulagaina ma faapolokalame meapu'eata i se tulaga e tapē ma toe faaola ai. O le poto o le tama na ia faapolokalame ai se faapogisa e lima minute. O le umi lena na fuafua e aveese ai tamaiti mai le nofoaafi a e le'i toe ola mai televise faatonutonu.

E leai se isi mea latou te mafai ona fai. O le potu faatonutonu autū o loo taatia mai i le isi itu. O le taimi e kiliki ai le ki ma aafia uaea, ona tapē ai lea ma le paoa o le faleoo o Konesetatino. Na o le tasi lava le avanoa lenei, latou te faia ai la latou gaioiga. A o matala faitotoa, na faaofiofi atu Monike i le va, sosoo atu ai Konesetatino. Na oso atu foi Marata. O le manuki matua na uisi atu ma le vaivai, ae le'i faatuai, na ia pasia mai i tua Monike.

Na iloa e le teine tuai e tataua ona latou faanatinati. O le selau iata mamao ese sa tu ai le nofoaafi. Na tamo'e atu i ai Monike, setusetu atu i lona vae na lavea. Na valaau faaRusia atu Konesetatino ia i latou, e o ese mai le nofoaafi ma fafo ma le faitotoa pa. Na talotalo atu e le tama ona lima i ai. *(e faia pea...)*

FEAU O LE ASO

Aso Sa, 10 Aokuso 2025 (Aso Sa Tama)

Tusi Faitau: Luka 14: 25 - 35

Manatu Autu: Amoina o tatou satauro (Carrying our cross)

27 O se lē ave lona satauro, ma ua lē mulimuli mai ia te a'u, e lē mafai ona fai o ia mo'u soo.

O le avea ma soo o Keriso, e ala i o tatou tofi Ekalesia, Tiakono, A'oa'o pe Faifeau, ua faae'e faatasi mai ai ma lo tatou tiute faasoo – e faailoa atu ma molimau i le Satauro o Keriso, na maua ai lo tatou faaolataga. E molimau atu e ala i la tatou upu e ta'utino, e ala i le amio ma le olaga faapa'iaina, e ala i galuega fai ma osiga taulaga o le faafetai. O lona uiga e faasatauro mea e mana'o ma loto ai le tagata, a e fai na o mea lelei e tusa ma le finagalo o le Alii. E faasilisili ma faamuamua Keriso i o tatou ola i mea uma, taimi uma, soo se tulaga e i ai. Ia leai foi se isi lava tagata, e faasili i ai lo tatou alofa, nai lo Keriso. O le uiga lea o lana a'oa'oga faasino i le tataua ona inoino muamua i sootaga faale'aiga – matua, uso ma fanau – ona faato'a avea lea o i tatou mona soo moni.

O le satauro e avea mou sei e tiu ai, o le pale e mamalu ai; a e sili ona tāua le fai ma amo poo se avega, ia lagona le moni, le mamafa ma le tiga, o le fai ma soo o Iesu. O le taimi e avea ai ma soo, o le ituaso foi lena e avea ai le satauro ma itutino fou, e faaopoopo i le tino, e lē na o se mea faapipii, e lē o se la'ei e mafai ona sui pe tuu'ese i se taimi, a ua avea o se itutino tumau, e oti faatasi ma le tagata. E ao ai ona muamua tapena lelei ma saunia atoatoa le tagata, a e le'i ulufale e tau'ave tofi faa-amo satauro. E pei o le faatusa a Iesu - ia faitau muamua pe ua lava tupe, a e le'i fausia le maota, ne'i alu alu matagā le tuu lē mae'a; pe iloilo muamua pe lava fitafita a e le'i alu e tau, auā na o le toilalo e maua.

O le fe'au, ia saunia lelei, ia lava le malosi faaleagaga e amo ai le satauro, o le auaua mo Keriso. Ia 'aua le toe solomuli gofie, faavaivai ma toilalo i tofotofoga ma fa'aosoosoga, i osiga taulaga ma le tautua faifai pea mo le Alii. O tatou tamā, ia fai ma ta'ita'i lelei i le aiga, le Ekalesia ma le malo, ia faamasani i le amo satauro, e ala i le gagana, le amio ma le galue, fai ma faata'ita'iga lelei, o se meaalofo sili lea mo le Aso Sa Tama. Lea ua tatou aga atu i Faiga Taulaga o lenei tausaga, ia loto tetele ma faamalolosi e amo o tatou satauro. Ia iloga le tafe toto ma le tiga o faalavalava, i lau sailiga taulaga, osiga taulaga, mo se faasiliga

lelei o lau taulaga o lenei tausaga, mo le viiga o Le na tautau i le Satauro.

O le upu e fai i le Malofie, 'Mana'o i le pe'a, talia tiga. 'A fia avea ma soo moni o Keriso, talia le tiga o le satauro ua faaolaina ai i tatou. E leai se mamafa e faatusalia i le mamafatū o le satauro na i tuāmaota o Ierusalema, na i le va o satauro o pagota. A e leai foi se mea e faigata i le Atua; e ala ona faigata pe lē gafatia le mamafa, ona o le fia malosia o le soo ma fia amo toatasi. Ua fetalai Iesu, *"Ia outou amoina la'u amo, ma ia outou fa'aa'oa'o ia te a'u, auā o a'u lē agamalu ma le loto mauilalo; ona maua lea e outou o le malologa mo outou agaga. Auā e avegofie la'u amo, o la'u avega foi e māmā ia."* Ia manuia le Aso Sa Tama. Manuia sauniga o le Aso Sa. Ia i le Atua le viiga. Amene.

Aso Gafua, 11 Aokuso

Tusi Faitau: Luka 15:1-10

Manatu Autu: O se mamoe ma le tupe na leiloa (A lost sheep and coin).

E o faatasi le **leiloa** ma le **toe maua** (lost and found); o le 'leiloa' e faasino i le tulaga agasala o le tagata e fano ai, a o le 'toe maua' e faasino i le alofa saili o le Atua ua faaolaina ai. Sa le'i mafai e le tulafono ma perofeta aemaise le tapuaiga a Iutaia ona saili ma lavea'i le fanau a tagata, mai le faamasinoga tonu ma le sala e tataua ai. A ua faailoa lona alofa mutimutivale ina ua afio mai e ala ia Iesu, ina ia saili le tagata agasala e faaola. A o i ai o Ia i le lalolagi, na Ia mafuta militino ma i latou na ta'u agasalaina e Iutaia: o ao lafoga, o e mama'i, o e lē mamā, ma i latou uma na faatagataseina; na fai ane foi faresaio ma le lotu, ua eleelea faatasi atu ai ma Iesu. A o le uiga lea o lona militino faatasi mai, ina ia avatu i tatou i le mafanafana o le alofa faaola o le Atua, o lona saili mai i lo tatou leiloloa.

Ua iloga le olioli ma le alalaga fiafia o le lagi pe afai e faaolaina se toatasi, ina ua salamō ma faatuatua ia Iesu. Ua masani ai le motu o tagata i le faatamala e teu lelei ma puipui mea totino ma mea taua ma le aogā o le soifuaga, e pei o tupe ma isi oloa; aemaise i le itupa o tina o latou nafa tausi e malu puipuia ai measina. E tuufaafegai lo latou tiga faanoanoa pe a lape le vaai, ma le fiafia mafanafana pe afai e toe maua mai le atamai, toe maua le mafauafau lelei, ina ua toe liuliu le tofa e fautua poto ai ma tuualalo alofa i tamā, ma faatonu lelei le fanau. Pe afai e toe maua le mea na leiloa, ia 'aua lava ne'i natia i Fatualavai,

‘omi’omi faaniu ‘ale’ale, a ia faalauiloa, valaau le aumea e fiafia faatasi, faatino le faafetai ua toe maua mai.

E faapea foi i le faatusa o le mamoe na sē a e toe maua; e iloga le fiafia o le leoleo mamoe i lona afisi ma sapai, e tauamo i lona fatafata le manu sa leiloa. E mamafa i le leoleo mamoe le tasi na leiloa, tusa lava po o le a le toatele o isi mamoe o i ai; e sili ona taua le mamoe e tasi o i fafo, na i le ivasefuluiva o i totonu. Ma o se feau lelei foi le toe faamanatu mai, ina ia ‘aia le avea le tele o le numera ua i ai, e manatu faatauagavale ai i le toatasi ma le itiiti ua tau faavaivai ma tau solomuli – ia faamamafa le galuega saili ia toe maua, ‘aia le nofo fifilemu ma faamafanafana i le vaai atu i le toatele mai. Ona o Iesu. Amene.

Aso Lua, 12 Aokuso

Tusi Faitau: Luka 15: 11 – 32

Matua: f32, *“Ua tatau foi ona tatou fiafia ma olioli, auā o lou uso lēna na oti, a ua ola mai; na le iloa foi, a ua maua.”*

Manatu Autu: O se atalii ua leiloa (A son is lost)

E tusa ai ma le soifuaga faa lutaia, e matua’i tiga, leaga ma solitulafono le mea ua faia e le ui’i, ua le āva i lona tamā; ma e mafai ona faasalaina o ia i le oti, pe a molia ma fai se faamasinoga, pe a finagalo ai foi le tamā. Mata sa lagona e i latou na faalogo i le faataoto a Iesu, le fesiligia o le gaioiga a le tamā, sa le’i tusa ai ma le latou tu ma aga masani. E oo i lona tuu ese o lona ofu talaloa a e tamo’e atu i fafo e faafeiloa’i le toe foi mai a le atalii, o se gaioiga ua maualalo ma inosia, e ta’uvalea uma ai tamā ma le aganuua lutaia. E faapea se auala e a’oa’i ai fanau fouvale?

O le tele o taimi, faato’a tatou valaau lava i le Atua mo se fesoasoani, ina ua uma a tatou auala ma taumafaiga eseese. E tele ina tatou lē amanaia o Ia, pe lē talitonu e alofa moni o Ia ia i tatou. Tatou te tuua’iina foi o Ia pe a tutupu mea leaga ia i tatou, pe manatu o mea leaga ua tatou faia e lē mafai ona Ia faamagaloina. Peita’i o le faataoto lenei ua na faailoa mai ia i tatou, o se ata lē tonu lea o le Atua. O le ui’i na leiloa i le mamao e gata mai ai i lona va ma lona tamā, peita’i na toe talia lelei i aao mafola o le alofa mutimutivale.

O le toatele o i tatou o tagata lolotu, e lē ni tagata solitulafono mata’utia pe fai agasala matuiā; a o tatou

vaivaiga ma toilalo, e lapelapea ma va mamao ai le fogavaa ma le Atua, e faatiga ai i isi tagata ma faatupu fememea’i ia i tatou; a e tatou te taumafai pea e faalelei. Ui i lea, o nisi taimi e galo ia i tatou o le Ekalesia o le nofoaga mo tagata agasala, e fesoasoani ai i tagata e suia o latou olaga ina ua iloa le alofa lavea’i o le Atua.

E i ai aso tatou te lagona ai pei o le ulumatua, ua lē amanaia i tatou ma sa tatou tautua, tutupu a’e ai nisi lagona tau faavaivai, ma lē mafai ai ona auai faatasi i le fiafia ma le Tamā, i se uso ua salamō. Peitai o le alofa o le Atua e sili ona lautele, e lava ma totoe mo i tatou uma o Lana fanau, pe ulumatua pe ui’i, e leai se tasi e sao mai le agasala, e tofua ma le mea e leiloa ai. E ao ona tatou olioli ma fiafia pe afai e toe liliu mai se tasi na leiloa, auā e matagofie ma silisili le olioli o le auai i le olioli o le Alii.

O nei e amata ai le Su’ega Ulufale mo Malua. Tatou olioli, o nisi o i latou nei, sa leiloloa a ua toe maua. Ia manuia le faamoemoe o lenei aso. Ma ia i le Atua le viiga e faavavau. Amene.

Aso Lulu, 13 Aokuso

Tusi Faitau: Luka 16: 1 – 18

Matua: *“Ua vivii atu le alii i le auauna amiolētonu, auā ua na togafiti poto; auā e sili le poto o tagata o le olaga nei, i lo latou tupulaga, i lo tagata o le malamalama.”*

Manatu Autu: O le pule poto leaga.

Fai mai se isi faia’oga o le Tusi Paia, e leai se tasi e faamaoni i le tala lenei. O le avea ma lutaia tausi tulafono, sa lē tatau ai i le auauna e pule, ona fai ni pasene tului i ana faaunega oloa. O i latou sa aitalafu ai e tatau ona toe totogi atu i fua o faatoaga suauu ma saito. Ina ua tulia le auauna e pule ona ua ia lē faamaoni, ona ia togafiti poto lea e faaititia le tele o tului sa i luga o aitalafu a tagata. Ui i lea, o le mau’oa foi ia, sa lē tatau ona ia faasala ma faate’a lana auauna e pule, auā sa lē tatau ona fai ni pasene tului i le amataga.

Ia manatua, e lē o a’oa’o Iesu i mataupu tau le tamaoaiga pe na fautua mo le galuega faatausi tusi. Sa ia faia le faataoto, e faatautu ia te i latou o lutaia, na valaauina e fai ma tausimea a le Atua, e tausi le tulafono, e tausia le lalolagi na faia e le Atua, e faasalalau faailoa atu le malamalama o le Atua. Ma

e lē o lelei ma lē faamaoni ona latou faia le galuega na tuu i ai, ma o le a oo mai le latou faasalaga - o le 40 tausaga mulimuli ane na olopalaina ai e Roma le fouvalega, ma toe faaleagaina ai le malumalu i Ierusalema.

O le mea e tatau ona fai e le au faresaio e lavea'iina ai mala o fotua'i mai, o le faamallosia lea o tulafono ina ia avea tagata Iutaia e paia mo le Atua, ina ia lavea'iina ai i latou. A o Iesu, o lana fesili: 'O le a se mea moni tou te faia e fetaia'i ai ma lenei mala? E faapefea ona suia outou olaga, e lē o le saga faamallosia o tulafono e faamamā ese ai tagata, a o le tatalaina atu o outou i isi tagata, e fa'aaogā ai faamanuiaga ua outou maua, ma a outou taleni e fausia ai paaga ma uo, ina ia avea ma "malamalama i le lalolagi", e tusa ona finagalo ai le Atua ia te outou?' O le tali a le Atua, o le Ekalesia, na suia atoa ai le sosaiete i totonu o le malo Roma, e ala i le valaaulia ma talia fiafia o tagata uma, i totonu o le aiga paia o le Atua.

E faamanatu mai le feau o lenei aso, ina ia faaititia le faamoemoe pei o Iutaia i tulafono, o faavae e fausia ma tusitusia i le poto o tagata, o iugafono tumau ma le tele o mau, auā e toso lava e le tagata ia i lana faauigaga, ua tele ina tutuli ese ai tagata mai le Ekalesia; a e faailoa le alofa moni, le faamaoni ma le amiotonu a le Atua o loo faamau i lana Afioga Paia, e ala i faai'uga ma filifiliga fai, e saga maloloina faaleagaga ma maopopo ai le tino vaaiga o Keriso i Samoa ma atunuu i fafo faapea le lalolagi atoa. Ona o Iesu. Amene.

Aso Tofi, 14 Aokuso

Tusi Faitau: Luka 16: 19 – 31

Matua: *"Ua fai ane o ia ia te ia, Pe afai latou te lē faalogo ia Mose ma le au perofeta, e ui lava ina tu mai se tasi nai e ua oti, latou te lē mafafai lava."*

Manatu Autu: O le mau'oa ma Lasalo

O loo faateleina pea le aofai o tagata e leai ni aiga (homeless) i atunuu i fafo, faapea le toatele o tagata fiaola e aisi solo i Samoa. E manatu nisi tagata, o le toatele o i latou nei o loo malolosi e mafai ona faigaluega, ma e na o le sailiga o ni seleni e faatau ai a latou 'ava malosi, ma fualaau oona a e leai se mea aogā e fai ai. A e tatou te le iloa le moni, se'i vagana

ua tatou se'e i o latou seevae ma lagona o latou mafatiaga. O Lasalo e pei lava o ao lafoga ma tagata agasala, sa faauo i ai Iesu. Na faa'esea e tagata mau'oa, ma le au faresaio tulaga mautū i le lotu Iutaia. O i latou nei sa manatu latou te maua tulaga aloaia i le lagi ma ave i ai le faamuamua pe a uma atu lenei olaga.

Mata o le ala lea na faate'ia ai le mau'oa ina ua i'u atu i seoli a e vaai atu ia Lasalo o nofo mai le Lagi. Sa i ai pea lona manatu o Lasalo e i le vasega maulalo, o le pologa e auauna mo le au tulaga mauululuga e i ai o ia; na ia valaau ai ia Aperamo e auina atu Lasalo ma se vai e faamālū ai lona laulaufaiva ua mu i le vevela o le afi. Pe afai e le taunuu lona faamoemoe, e ao ona auina atu Lasalo mo se isi feau, e logo lona aiga ina ia 'aia le ui mai i lona auala. Peita'i, o le autu lea o le faataoto a Iesu – ia 'aia ne'i i ai se Isaraelu e manatu o ia e faapitoa ma tulaga ese mai isi tagata uma. O loo manino lenei mea ma latou faitau ai i aso uma – ia latou tausi i tagata matitiva, o fafine ua oti a latou tane, ma fanau ua matuaoti, o le tagata ese, tagata sulufa'i. Ua loa ona i ai le poloaiga a le Atua, a e latou te le'i faia; o le feau la e fia ta'u atu, ia amata nei loa ona latou faia, a e le'i tuai tele.

O le tulaga lea e finagalo ai le Atua, le faigamalo na afio mai ai Iesu e faatuina. Ma o loo fesili mai Iesu ia i tatou: 'O fea le itu o loo e i ai, o le itu a le Atua, e pei o le au ao lafoga, ma tagata agasala, latou te vaaia le alofa ma le faamagaloga a le Atua, i totonu o i tatou? Pe e te lē fia suia ona o loo manaia pea le faamau'oa? Ia manatua foi lenei feau faamanatu - 'aia tatou te ola e saili ai so tatou nofoaga i le lagi, auā e le maua i se mea tatou te fai, a o le meaalofoa foaifua e ala ia Iesu Keriso. A ia tatou faia le alofa moni i isi uso puapuagatia, e pei ona sa faia mo i tatou e Keriso i lona satauro. Ia manuia ona o Iesu. Amene.

Aso Faraile, 15 Aokuso 2025

Tusi Faitau: Luka 17: 1 – 19. Matua: *15 O le tasi o i latou, ua na iloa ua faamaloloina o ia, ona toe foi mai lea o ia, ua vivii atu i le Atua ma le leo tele; 16 ua faapa'ū faō ia i ona vae, ua faafetai mai ia te ia; o le Samaria foi o ia."*

Manatu Autu: Agasala, faatuatua ma faatinoga – mea taua o le Malo o le Atua.

Sa le'i mapu le Alii o Iesu i le faafetaia'i o le au faresaio, pe a latou faitio i lona faauō i le 'au ao

lafoga, o tagata agasala ma i latou i le vasega faatauva. A o le tala lenei, o loo Ia faailoa ai le ituaiga amio e tataui i ona soo ona soifua ai. Pe afai e faamamafa pea e le au faresaio le faamamaluina o nei tulafono, o le toatele o tagata latou te lē mafai ona latou tausia. O le faia o auala e lagona ai e tagata le loto ta'uagasalaina, ma le manatu o le a teena i latou e le Atua, e lē o se mea amiotonu. Ua leai se eseese ma le toe lafoa'i o le alofa o le Atua i ona fofoga. Pe afai e ta'utino e se tasi lona sesē ua agasala, e tataui ona faamagalo atu i ai pea lava pea. E lē tāitāi mafai ona tatou toe totogi i le Atua le mea na Ia aumai mo i tatou.

O lo tatou taumafai e mulimuli i auala o le Malo o le Atua sa soifua ai Iesu, e lē o se mea tulaga ese; a o lo tatou fa'aaogaina lena o le mafaufau lelei! Ua fa'aalia ai o i tatou lava o tagata moni a'ia'i, o loo ola e tusa ai ma poloaiga a Le na faia i tatou. O le tagata ese, le Samaria na inosia ma te'ena e Iutaia, ua ia fa'aalia le amioga faavae sa'o e ao ona tatou manaomia, e fai i le Atua – o le loto faafetai. Le talitonuga e mafai ona tatou faatoilaloina a tatou agasala, e faamagalo mea leaga ua fai e isi ia i tatou, e iloa le alofa o le Atua – e leai ma se tasi o nei mea e mafua i so tatou lelei po o se tatou potu. O le alofa faamaoni o le Atua ia i tatou na te fa'atagaina mea nei ia tutupu.

O lepela Iutaia e to'aiva na faamaloloina, na nanati atu e vaai ositaulaga, ia maua mai le faatagaga latou te toe foi atu ai i o latou aiga; na o le tagata ese Samaria toatasi, na ia manatua e faafetai ia Iesu, o Le na tino mai ai le alofa faamaoni o le Atua. E pei ona sa fetalai ai Iesu i se isi o ana a'oa'oga i ositaulaga sili ma toeaina, *“E moni, ou te fai atu ia te outou, E muamua atu tagata ao lafoga ma fafine talitane ia te outou i le malo o le Atua.”* Mataio 21:31.

E aogā foi lenei feau e toe faamanatu mai ia i tatou le olaga ua te'a ma o tatou olaga i le taimi nei. Pe o tatou manatua taimi na alofagia ma faamaloloina ai i tatou, taimi na galue ai le alofa o le Atua ia i tatou? A e na tatou iloa faafoi le faafetai i le Atua? A o faapefea ona fai i tatou ma mea faigaluega a le Atua, e faatinoina lona alofa faamalolo mo isi tagata, le alofa faamagalo moni?

Fesoasoani mai le Agaga o le Atua, ma ia ia te Ia le viiga e faavavau. Amene.

F. Tolua

O E UA MALILIU

ILAI TUPUOLA FS

(Iulai 11, 1940—Iuni 9, 2025)

O le susuga ia Ilai Tupuola, o le Faifeau Samoa Penisione EFKS, na soifua a'e i Fagasa, Amerika Samoa. Na fanau o ia i le Aso Tofi, Iulai 11, 1940 a e na valaauina e lona Matai i le Aso Gafua, Iuni 9, 2025; ua atoa ai le **84 tausaga, 10 masina ma le 30 aso** o lona soifua. Na amata lava lona soifua a'oa'oina mai i Tutuila, mai a'oga faifeau e o'o i a'oga maualuga, ona alu lea i le Kolisi Leulumoega Fou, ma ulufale atu i le Kolisi Faafaifeau Malua mai le **1963 - 1967** (le vasega toatolu ma Reupena Samuelu FT & Sulufaiga Samasoni FT). Na faaipoipo atu ia Lua'ipoumalo Le'iataua Taito, i lona tausaga faai'uso, ma faai'u manuia le taumafai i le Kolisi Faafaifeau Malua. Na latou malaga ai i Amerika na fa'aauuina le taumafai ma ulufale atu ai **1977-1980** i le School of Theology Claremont CA. Na maua ai lona Masters of Art in Religion.

1980 Fonotele i Sapapalii Savaii (faailogaina o le 150 tausaga Tala Lelei), na faauuina ai le tofi Faifeau Samoa.

1980-1993 Valaauina e fai ma faifeau i le aulotu Samoan Community Congregational, Long Beach EFKS, na avea ma Faifeau Toeaina i le Pulega Los Angeles, e sui tulaga ia Fo'isia Tuiofu FT. Na avea fo'i ma Teutupe Fesoasoani i le Matagaluega Amerika EFKS.


1993-2006 Sa valaauina ai e fai ma faifeau i Leauva'a EFKS, ona mapu mai lea i Amerika.

2008-2013 Na avea ma Faifeau i Arizona, First Samoan Congregational Christian Church UCC-EFKS ma penisione ai ua atoa le 70 tausaga o lona soifua. Ona mapu ifo lea ma lolotu ia Faitama'i Leota FS, i Arizona EFKS.

Ona lolotu mai lea i le Savali o le Filemu EFKS Las Vegas, Matapo'o Peniamina FT. E le faigofie le o mai Arizona i Las Vegas, ona o le mamao, a e na lolotu mai ma faamaopopo. O nisi ia molimau o tagata e finau ma tauivi, faapei o lenei Faifeau Samoa penisione Ilai Tupuola ma le aiga.

“Le auauna lelei e, ma le faamaoni ulufale mai ia i le fiafia o lou Ali'i.” Ua matou mafuta ma molimau i mea alofa a le Atua na atagia i lana auauna. O lenei faifeau e to'amalie, na te momoli mai fautuaga mo le manuia o le aulotu. E faamanatu mai lava e ia Faavae ma Iuga Fono a le Ekalesia, o ta'iala i

ILAI TUPUOLA FT



Potopotoga ma fonotaga. O lona soifua ma lana auaunaga, ua viia ai le Atua, ma ua mafai fo'i ona ave'a o ni meaalofo tāua mo lenei galuega.

O ona toe sauniga i Arizona, **Iulai 18, 2025**, na ta'ita'i susuga ia Saitumua Tafaoialii FT, o le Komiti Faatonu o le Matagaluega Amerika, a o le Faifeau Toeaina o le Pulega Matu. O le susuga ia Uamuli Su'a FS, Failautusi Matagaluega, na faitauina le Tusi Paia. O le susuga ia Leaoga Tanuvasa FT-Ta'ita'ifono Matagaluega na saunia le tatalo. A o le susuga ia Filo Taua'ivale FT na saunia le lauga. Sa ou faia le molimau e tusa ma la matou mafutaga faa le aulotu, O meaalofo faaleagaga, loto ma le mafafau, na faaso mai ai lenei faifeau penisione o Ilai Tupuola.

Iulai 21, 2025-na molimoli atu ai lona tino maliu mai Arizona i le fale maliu Fagaalu Amerika Samoa.

Iulai 23, 2025 na faia ai le sauniga faamavae i Fagasa EFKAS, ma fa'aauau atu i lona toe sauniga i le tuugamau, na ou ta'ita'iina ma faatofa atu i le pese faamavae a le au Kerisiano *Talofa uso e, tofaina oe*. Ia manuia lau malaga tamā, faafetai mo fautuaga ma tima'iga, faafetai i lou alofa.

Saunia susuga Selulo Usoagalelei Lago'o FS
EFKS Savali o le Filemu, Las Vegas
Pulega Matū, Matagaluega AMERIKA

TAAVALE FOU OFISA TUTOTONU



E 5 ni taavale fou ua faatau ma tuuina atu i nisi vaega o le Ekalesia i lenei masina. O pikiapu e 2 (ata i luga), e mo le Pule o le Televise le tasi a e mo le Faatonu o A'oga le isi. E i ai ma veni e 2 mo Kolisi o Tuasivi ma Nuuausala. A o le Veni lapo'a (15 nofoa) e mo le Ofisa Faamisionare. O le tatalo a le Ekalesia, faamolemole ia alolofa i latou ua tuu atu i ai, ina ia fa'aaoga lelei ma le tatau nei mea totino, ia teu ma vaai lelei ina ia umi ona aoga, aua o le soifua faitaulaga ma le ma'au o le Ekalesia o loo faatau ai.



Afioga i le Teutupe a le Ekalesia Faapotopotoga Kerisiano Samoa, susuga Melepone Isara FS i lona ofisa i le Maota o le Ioane Viliamu. O ulua'i ata na pu'eina mai le masini pu'eata fou a le Sulu Samoa.